



石園全集卷第十八

亦園嗣響

丙午暮春三月偕劉平田前輩坐梅公先生

亦園風日

閒美時花紛灼因請觀灌瓦研劬及唐宋名人書法繪

事古色照人歎未曾有余偶探架上得二詩箋詠園花

十律用杜老過何氏山林韻典雅高秀波瀾老成蓋遠

山夫人筆也雲霞周身僅睇其被歎服久之先生笑曰

子將盡觀之乎顧公子維饒取全帙以示維饒曰子盍

爲吾母言諸余自視山居深隱目不見菁華久矣茲一

日中良辰嘉客奇石名花香茗幽鮮清言彌日獲縱觀

古今人書畫詩篇璀璨陸離陶寫怫鬱數年來攢眉稍

遠山夫人舊有石園唱和及隨草行世載於倚聲詩緯等集詞壇膾炙久矣今復有亦園嗣響之編余讀之如飲善見醍醐煩渴立消如聽師子筋絃衆樂輟調又如月夜石闌上默記霓裳新譜不覺神遊九霄夫人博覽羣書酣思賦詠於古今諸體春容乎大篇瀏亮兮短製無不窮微臻妙按其音節自然諧和非特不作香奩彤管脂粉旖旎之習即世之號為褻博儒生能以其優孟衣冠鼓脣竊譽儼然樹幟登壇夫人目攝之而有所不屑也故其詩寫境摛情匠心獨詣步虛縹緲出入溟滓絕無人間煙火氣題詠雖多雅不欲炫於世是編皆維饒侍膳問安之暇從緜几縑素中竊諷而手錄之積漸

成帙才十之二三啓請付梓至再然後許之於是都人傳誦紙價翔踊四方名士造石園而問字者必求嗣響讀之竊爲枕秘其爲人所傾慕如此昔瞿曇覩明星成道耶輸夫人亦從受記羅睺密行第一在十大弟子之列今司馬公主倡而夫人隨之夫人有作而維饒述之此亦多生眷屬夙植善因聚於一家以聲音爲佛事之證也迦陵頻伽未出殼時即發聲微妙則維饒所本又可知矣故余以爲金閨麗質玉臺新詞繡腕蘭心擅奇騁豔無代無之而得全於夫婦母子之間備天倫性情之樂惟夫人有焉豈非再來之耶輸陀羅乎夫諸經長行之後必有祇夜伽陀爲之明贊演唱梵音清雅令人

樂聞是亦詩家所謂一唱而三歎之義也不可以語言
文句求亦不離語言文句善讀夫人詩者應作如是觀
已酉端陽後五日進賢遂初子朱徽書

石園隨草偶爾成刻間覩諸名家所選倚聲詩緯諸書
亦以內人遠山數章附之集中藉用自信年來偕隱章
門余以老嬾成癖而水邊林下茗椀相對遠山時有所
觸輒復成吟然而小兒女索果含飴婢子環問酒糝米
鹽事無虛日於是得句雖多而全篇寥寥矣夫春草池
塘可以單詞入夢重陽風雨不免催租及門豈曰惜墨
如金蓋亦識法者懼耳兒裕彙而成帙復欲授梓質之
母母有難色余曰發乎情止乎禮義即少許亦復取勝

若如昔人比擬於謝希哲曰隱約深厚有古幽閒淑女
之風欲引而進之以衛莊姜許穆夫人之列則吾豈敢
灌研齋主人梅菴書

詩四十八首

生次孫之三日家太虛宗伯朱遂初憲副羅篁
菴學士饒型萬都垣鄒謙受翰編枉賀畱集小
園并商講堂學會喜賦

不約而同過翟門人傳五老慶生孫欲開講席明風教
且效者英醉月尊得句疊成倡是和聽啼又喜弟強昆
天倫樂事貽謀盛他日森森起石園

催妝詩三首

為熊少宰令愛于歸羅宮
詹公郎時七夕後五日

穿鍼還上綠波樓正及芳辰詠好逌遙望雙星纔渡後
飄飄繡幄下銀洲

乘鸞恰喜是新秋旖旎光生紫翠浮試聽歌吹雲外徹
佯嗔女伴促梳頭

掌珠乍別淚頻霑遮莫輕痕損黛尖漫惜畫眉期獻賦
先將綵筆詠香奩

以酒換牡丹二首

簡點園林待客歸江城寥落此花希漫將佳釀酬鄰美
不卜知名是醉妃

旋飄瑞葉綴寒枝新植須教錦幔持誰謂惜花春起早
惜花還在孕花時

雪梅

孤芳偏趁六花飛爲靄幽香半掩扉鶴夢乍回驚羽亂
玉樓人靜徑添肥

紅梅

梅條纔種兩三枝綠萼香檀隱所宜猶恐主翁還競豔
新妝故故點胭脂

冬暖趁雨移植梅竹次日忽雪

時梅君
歸文水

乍暖徵初雪登樓景倍奢同雲迷杳靄嵌石補谿劔昨
雨剛移竹今梅即著花編籬巢素羽藉草護丹芽疎柳
驚消黛歸鴻淺印沙夜殘疑上月戍鼓靜鳴笳回首文
江思應浮訪戴槎

壽文燈巖夫人六表

截嶠匡峰飛紫煙大家彤管記瑤編辭榮不羨山公啓
課讀咸稱侃母賢相望潯陽惟九派睽懷鷺水共三遷
余與夫人皆遷自吉州為言偕老人難老甲子初逢猶盛年

用梅君七夕舟泊龍窩寄懷韻

不覺驚秋病未瘥嬾看兒女供茶瓜鉞樓漫賦天人巧
翠幄遙臨歲月賒虹見乍收新雨淚河明初渡舊星槎
龍窩獨眺詩思遠客遇良宵始憶家

亦園即事

淩明初茂暑初收斷續蟬聲自唱酬翠閣峭風驚宿燕
石門斜月挂清秋驅炎漫怯螢光度別夢還同蕉影浮

玉露漸隨宵漏永閒窗如畫又疑舟

聞孫曹弟婦寄扇索書

聞弟為忠肅公家孫

偶讀新編世澤隆一門忠孝最池東克家自有名人業
舉案還歸女士功疏奏三章傳漢史研畱千載泣宗風
何年返舍瞻閨範一笑相逢娣姒同

和梅君七旬自壽韻

晚節高吟興有餘每當勝集選鋒車杯中共醉長春酒
架上時翻舊日書健步不煩營壽杖望衡恰好近仙廬
寒梅競雪還增豔瑞靄雙清景自如

人日

和風先釀隔年春曲曲溪流尚帶蘋酒泛麻姑還壽母

雲留月姊正窺人香生几案盤辛美羹煮園蔬摘甲頻
共對晴光看浴鶴小伶歌奏一回新

元夕

客歲中秋霽應知此夕圓江城饒鼓吹景物漸暄妍醉
酒徵人瑞張燈羨市穿構亭如昨日屈指即經年剪勝
花先逗傳柑節又連玉蘭方脫帽煙柳競輸綿巖隙疑
螢綴枝頭信鳥懸落梅驚舞鶴高火蠹遙天皓魄層層
雪香塵步步蓮賽神占里諺角技取時憐碧燄衝絲直
紅雲漏綺鮮蹋歌喧五夜擲箸費千錢似有韶音度聯
吟月滿筵

仲春熊蓼菴姑母招集東湖侶鷗閣

極目江城一望收望中煙樹接天浮草堂正喜成新築
朱邸還同識舊遊雨過春亭三島月雲連蘇圃兩湖秋
山光掩映名花發會聽歌聲徹畫樓

寄輓嘉禾三烈為張蘧林司馬

我聞虎丘涵劔光遊人千古弔真孃又聞錢塘蘇小小
客過歔歔悲蔓草如茲二婦何足奇不朽曾不讓鬚眉
何況雲黯燕臺月折玉埋香悼三烈三生石上舊因緣
矢志長齋繡佛前千回萬劫祇一死共視微軀薄如紙
為子死孝臣死忠三心皎皎將毋同絕命詞成不返顧
倏然遂隔泉壤路廣柳蕭蕭易水寒胥濤日夜撼江干
楚有蘭兮湘有竹疑化駕湖半谿綠而今行道指豐碑

風雨酸辛猿鳥悲試看遼海歸來鶴惜哉九原不可作

初雪

歲矣冬云仲時兮日漸長落英香藉枕凍藥玉含芳研
結琉璃脆庭驚柳絮狂峭寒欺被薄小飲緩晨妝

祝姑母熊夫人五十

日麗璇枝綴綺筵花時正共舞衣鮮飽含晝永春風暖
月蘸波平畫閣聯谷鹿瑞凝司馬宅洪崖音度彩鸞牋
公車好待徵書至第一南宮指顧傳

春日梅君偶恙初愈施愚山觀察攜詩過訪代

和二絕

小苑花絲總未看池塘過雨長新湍淡旬徑滿深苔綠

入戶春風尚怯寒

好句如聞石磬音

來牋石磬式

一尊初試話燈深空煩藥裏紫

心久七發真能起病吟

初春偶以園中花樹和杜工部過何氏山林韻

十首

梅花

忽趁晴光好探梅過小橋花絲香在水榦古意凌霄庾
嶺名空著羅浮信可招漫拋東閣醉攜手路非遙

水仙

鏡閣宜仙隱康年入夢清

昔謝公夢水仙產道韞余以康子生女六六

漫餐雲子石

待聽杏園鶯珮解江皋月香凝玉糝羹凌波何處是擬

伴麗人行

海棠

垂絲

似有無香恨微酣力不支垂垂分曉霧裊裊骨新池
夢驚還續蜂媒惜未知畫檐煩點綴春色競紛披

竹

本懷君子節故爾不宜花枝勁能彈雀鞭長似引蛇客
來何必問月到儘堪賒為愛淇園近林西即是家

月季花

自負鉛華永公然季季開纔依霜後菊旋鬪雪中梅清
約姮娥伴紅驚燕子來幾番風共雨時點碧霞苔

新柳

韶光偏著柳幾樹小平泉拂水初勻黛含金細吐綿煙
生迷綺陌雨過長榆錢

櫟柳實亦如榆錢

來歲煩君汁春風濯錦

川

瑞香

雲巖生遠夢山谷競幽香嬾逐韶華豔寧同冰雪涼風
流名弗稱露甲影難藏自是花間瑞霜凌葉更蒼

玉蘭

嫩隅躍新綠玉樹湛芳池掌浥金莖露中翻白接羅鈎
簾窺月姊張幕護蜂兒若解幽人意迎風素影隨

蘭

草堂新雨後洞壑飽晴雲鳥語花微句鷗盟水潏文砌

英開九畹春色已三分小徑顛冬繞香繡鶴夢紛

山茶

好句難追杜其如見獵何經春窺戶少偶恙覺愁多乍
覩楊妃態新翻玉茗歌類有白者名玉茗晚林霞散綺鸚鵡喚人
過

牡丹盛開惟玉樓春一枝為冠詩以賞之

異質偏從雨後芳淺深霞綺疊新妝吾家自有清平調
會向春風醉豔陽

秋日小園瞻禮大士見諸花盛開芙蓉如慢

曉閣初開露尚濃梅檀淨處落晨鐘經翻貝葉機常息
夢裏金容覺後恭小圃竟成香世界假山真削玉芙蓉

趁時行樂誰能解纔度賓鴻又及冬

祝劉媯翁偕陳夫人雙壽

幾經清淺詠桑田幸結朱陳續舊緣憶自分攜江浦月
遙瞻雙祝豔陽天芝蘭共韻潘輿美翟第還增譙國賢
桃熟正逢紅杏候文光點點照華筵時兒公車率其同輩稱觴

端二為余初度梅君自螺川以詩見貽依韻寄

答

為厭居閒久心猿逐鹿奔有廬依古郡無谷豈名邨急
雨翻榴火烹鮓醉竹軒粵師紛載道是處閉柴門

以螺川大水口占紀事

未旱先祈雨時違即怨天人心今乃爾災異豈徒然市

虎方歸穴轟雷又策鞭秧鉞纜刺半木隸已微全絳水
雙流合平疇萬頃捐城垣驚繫艇黎庶斷炊煙吉水難
成字螺峰僅識巔懸知眠未穩為報席頻遷李郭還同
載飄飄江上仙

時梅君招郭郡公於舟中

避暑偶作代東梅君

似學羲皇嬾晝眠棲霞曾受白雲篇拋殘世局方云隱
得悟清閒即是仙畏日穿檐還補竹薰風透戶恰舒蓮
梅巖漱玉堪消夏載月何期一棹旋

半軒觀魚倏然虹見

雨後天名古碧缸

家有舊瓷缸其色名雨後天

游魚競唼響澹澹荷翻滴

露香生研燕慰飢雛語到窗月就半軒虧處滿虹垂遠

澗暈來雙漫言久潦宜東見幻影依稀化玉降

秋日寄石園二首

露結荷衫冷寒從此日支雁來紅染徑

并

月下白盈墀

菊沼溢平於掌花開信解頤園闕仍晝掩香滿一庭宜

重陽來日是果放報君知雨長楓人醉霜凌蜜父垂夢

懷花潤筆

金錢花故事

萍笑月生池極目三秋晚休辜詠菊期

秋社牆北忽開紅梅數點二首

風靜蕉林綠似裁清香細細逼人來司花應妒矜時桂

八月爭開嶺上梅

乞得開韻酒相將餞燕回紅絲聊繫足記取亦園梅

次小園聽雨韻

壬逢端午日水應接遙天竹醉三湘雨池涵半壑煙蟬
聲鳴復咽蝸篆斷還連茗椀閒相對迎梅又一年

題月窗美人

一捻腰身翠染裳曉妝和露掐天香閒閒靜對渾無語
爲笑人間有底忙

祝蕭母楊孺人八十和蓼菴姑母韻五首

從子孟昉請

欲訪春浮每未偕閒從青鳥問瑤齋爲傳大耋逢初度
漫寫新詩寄遠懷香泛胡麻堪作供光懸寶婺正盈階
陶弇風景仍如昨久斷鉛華謝古釵

久斷鉛華謝古釵芝蘭何異長庭階雲煙變幻頻經眼
身世蒼茫不置懷尚可挑燈窺細字猶然繡佛禮深齋

蓬萊幾度聞清淺應向麻姑笑語偕

題曾旅菴夫人小影

喜從妙墨識天真彷彿如傳洛浦神幾向經書消晝永
一簾花雨得詩新每隨官下調琴鶴又見階前長鳳麟
舉案漫言生也晚相將共對百年身

詩餘九首

行香子五首

上巳

小小園亭百卉芳馨水邊花下任怡情憑誰妙手繪幅
丹青倣王摩詰吳道子倪雲林風動波平景物撩人
綠穠翻燕剪紅輕欣逢上巳共賞良辰擬蘭亭禊飛英

會鷺鷥盟

初霽觀牡丹

好鳥催耕坐老啼鶯桑鳩喚婦曉窗明牡丹初放尚帶
微醒看青猊白蓬萊紫玉樓春 雨中過半些子新晴
閒拈小調詠芳卿怕春歸早似笑還顰有醪醖伴凌霄
侶惜花人

題小冊美人

的的丹青裊裊勻勻神情纖悉恁輕盈朱脣欲啓羅帶
初縈似紅樓豔綠窗影漢宮春 桃源期伴隔院邀盟
薔薇翠唇石榴羣凝眸顰顰倚樹含情羨一谿水一林
石一雙禽

題陳伯璣浣花君圖

半束羲琴一段巫雲輕衫澹染竹根青蒼龍斜倚寶鴨
新熏似妝初罷風初裊韻初生 仙塵遙隔幸睹芳真
何時攬被羨寧馨秋高月小花滿庭芬期憐香伴清閨
裏共論文

有以畫筵繪沈香亭景索題偶賦

應惜芳辰宮院沈沈牡丹亭畔韻幽清清平調小萬古
猶新羨當時遇花時景醉時吟 海棠無力敲玉闌凭
笑看飛燕舞身輕明眸似啓雅意思深記霓裳曲淋鈴
雨荔紅塵

連理枝一首

遣興

不效遊仙去且向塵中住半構新軒舊園名石足成佳
趣看芙蓉隔岸錦屏開勝湖山雲樹往也何須慕今
也何須驚幸識投林傍觀宦海容誰道故賦歸來釀酒
有黃花與高人警悟

滿江紅二首

秋雨

點染時光早不覺黃花俱釀只連宵嫉風膩雨略愁微
恙金粟香生清磬遠芙蓉錦抹秋江上念公車此日近
長安離懷放丘壑志琴書況疎林內茶煙漾乍雲斂
溪澄一輪初盪醉葉似傳青女信新詞更喜紅兒唱倚

雕闌無事聽歸鴻襟期暢

重九和韻

雨款重陽新池內碧滌初漲羨雙鷗翩翩自若舊盟無
恙側帽多情誰復戀何須嘯傲龍山上憶菰桑瀝酒醉
持螯今誰餉花欲燦賺蜂漾秋未老酣蛩唱笑稽古
搜今陳愁空釀却病正須延壽果登高共倚齊眉杖歎
吾曹曾定幾風波難名狀

滿庭芳一首

花朝偕陳浣花君朱女琴士讌集熊姑母東
湖草堂隨過杏花邨第風雨驟作而歸因訂
尼菴之約

纔過春分又將寒食煙光處處宜人欲邀仙侶選勝趁
芳辰尚卜陰晴未穩重遊意兀自逡巡城南畔招提小
小桃李亦紛紜閒評傷往事王孫草綠帝女花芬漸
苔侵蔣徑蒿滿張門賸有方池碧漲凝眸處樹古亭新
還堪歎驚雷迅作風雨杏花邨

母大人生平喜讀史鑑及博物掌故諸載籍而不肯
輕有所著作間發爲吟詠輒於丹鉛時隨意疾書書
畢多散見古人簡冊中莫能辨裕每心識其處乘間
搜閱錄而藏之就所見以爲後先自壬寅迄戊申七
年中所得詩若詞不下數千百言而裕所手鈔者僅
十之二三躬菴彭先生見而序之程邨阮懷伯璣三

君子復加編定僉曰宜亟授劄劄氏俾天下知大家
彤管不與閨閣綺麗競勝且貽之奕世有所取則焉
裕跽而進之堂上大人色喜母呼裕前曰是寥寥者
奚當大方姑置諸裕固請遂再拜授梓續之倡和隨
草之後題曰亦園嗣響亦園者從余家石園得名在
章門第宅之右偏小築亭臺環植花樹亦如石園焉
人咸以龐公鹿門溫公獨樂方之實爲兩尊人觴詠
游息之所云戊申七夕前一日不肖兒振裕謹識

石園全集卷第十八

石園全集卷第十九

遺詩一

西舍詩四十二首

庚子除夜挑燈述懷寄內

別家一月餘不覺歲云暮獨酌未成酣挑燈何所務憶
自登章江同余兒子裕擊楫羨中流舟行疾如鶩但欣
風月好兼領山川趣觴詠頗閒適全無波濤怖浹旬抵
長淮公車時當赴制府見兒來開閣隆禮遇謂是凌霄
翮天衢穩獨步既令健丁隨又檄沿途護壯哉送兒行
廿夜黃河渡有如泛平湖登岸向營駐呼酒共兒言哽
咽難成句次早東征裝車馬鱗鱗度兒淚向余語思母

難捨父我聞衷腸裂忍涕頻囑付丈夫志四方豈必長
相聚少年遂功名努力圖建豎時雖慢晴明北上恐寒
沍飲食并起居勿盡倚僮僕兒云當書紳一如大人諭
再拜別膝下歡然登輿去行行不忍離同至十里鋪兒
屢請我歸遲回始返馭絡繹見行人坦夷長安路南來
濟黃流風急浪翻互乃知昨宵平真感陽侯助鼓柁下
韓臺依微出遠樹偶過湖上閣長虹互煙霧返櫂抵安
宜依然憩舊住荏苒對年華歲闌夕云除東家競簫鼓
西舍恣忤飫高火喜連升爆竹走穉孺雨雪驚旦宵殊
牽游子慮兀坐歎寂寥詩書供漱茹回首念江鄉能無
懷內顧夢寐到閨闈脈脈共情愫自念兒遠征必當計

余獨椒花堪誦節辛盤想煮蔬有婦可承歡熊叶竚行
祚屠蘇領誰先六六同豫豫比來益岐疑言笑驕乳哺
明朝慶履端幾處煩思慕兒行近燕邸浪暖桃花馥上
苑好看花彤墀堪獻賦倘問我歸期歸期難預卜尚欲
走秦淮仍復遊湖潑行李知蕭蕭訪友於何處會當過
虞山胷臆猶可吐攜去石園草相求為訂注唱和隨共
刻球琅問韶濩庶幾吾兩人不負平生素新集持歸來
舉杯同快讀書茲聽漏更雞鳴天欲曙

壽劉平田七十

扁舟吳越賦歸來南望極星燭上台念我平生惟好友
春華灼灼綺筵開筵開家距不三舍簪裾澧田稱王謝

我公文藻更超羣孝標公幹真流亞於時花鳥正綢繆
天香桂子忽清秋酌醴我來慙後至白髮相對笑盈頭
盈頭白髮固爾爾却憶當年雁行齒鹿鳴鶯轉少年場
兒女締姻自茲始我歌皇華公鳴琴梅花嶺外少知音
從來名高衆所忌荆榛疑亂桃李林公視五斗如敝屣
飄然拂袖還鄉里堂上稱觴樂有餘一日三公易不以
偶然江淮草木驚重臣開閣擬平津特疏入告舉真才
仍還飛鳥泰水濱太翁聞之爲色喜天胡不慙遂弗起
公乃徒跣枕塊苦偃臥衡門飲泌水猿鶴東山不可畱
玄纁又賁巖穴求公一趨召返初服不數公家古靜修
比余客還自淮海握手奕奕舊符采僦居南浦水悠悠

一年一晤不遑再公耽經史寄閒情玉爲骨兮水爲神
一局碁枰清晝永山僧野老相過頻久矣畱心事禪悅
西峰青原時登陟竺乾實探真筌蹄如彼蘇黃誠有得
近來肯構大所居不羨墨莊與于閭滿庭多種宜男草
同人豫寫弄璋書共言杖屨真矯健即此一端已可見
我家屋廬盡劫灰欲稍營圖力弗贍後公之生三四齡
鬚髮難覓一莖青公今古稀還若壯人情世事等餅瓠
有酒且來與公酌丹經何須發九籥歲歲相期快遊從
搔首江天只一嚳君不見吾郡卯戌同兩榜數十譜籍
今何往城郭祇存兩令威二老風流看競爽又不見同
里春浮與錦鱗意氣肝膽稱四人歲寒祇有公兼我能

不珍重百年身吁嗟乎百年難邁是閒暇鷺水螺岡堪
入畫欲訪兼謨與洛中耆英九老共聯社

中秋日送熊雪堂少宰新擢左司馬入都

秋半天高玉宇清蟾光澹蕩著人明西山朝爽浥行色
欣傳旌節出江城每聞行行且止大臣難進古如此
冲皇特簡鋒車迫先生勉爲蒼生起十八年前老銓
臣山公啓事幾回新暫重樞密憲文武端揆競看領簪
紳多君才大學如海與余論交三十載其間憂樂總能
同風雨晦明真不改憶昔見君初第時裴王一席便相
期宰邑果爾晉文部聲名赫奕重彤墀時余謫席向三
楚赤壁明月瀟湘雨聞君努力持舊規量移祿勳不親

補嗣是赴召入長安典劇盡說得人難舉朝推轂不可
二一出衆正爭彈冠聯鑣燕市同文酒每談國事心如
疾忽爾銅駝委荆棘灑血蒼昊同搔首 聖朝應運肇

鴻猷闢門登進盡名流君貳天卿我佐樞相視莫逆心
悠悠君忽拂袖還鄉里余懼無端仕且已冥鴻先後向
南飛余寄江淮君桑梓一朝求舊沛綸恩余又同君趨
都門人儼商山稱四皓各攄丹赤奉 至尊未幾君因
銜卹去余命不猶仍罍累幸返初服遂生還復向白田
作流寓君念飄零招我歸文水田園半已非卜居偶寄
灌城隅道義肝膽實相依相依尚恨一城隔三日不見
想顏色白眼相看彼何人非君安居不可得千秋知己

更阿誰可堪久聚乍別離酌酒河橋仙權遠章江水發
正瀾瀾水浮星槎正八月天香夾岸度吳越湖山是處
富奚囊願言星馭馳金闕世運喜見泰階平善類拔茅
慶彙征星沙淝水相輝映東南氣色益崢嶸調高不須
愁和寡謀斷今有同心者林壑萬里企雲霄翹首中朝
相司馬

送李雲伯學憲致政歸秦二首

清秋葉落澹朝暉拂袖還山願不違桃李蹊成人漸遠
芙蓉苑好客初歸秦關月到新榆社渭水晴生舊釣磯
別去應逢鴻雁度江聲帆影正霏微
豫章多士重龍門歸臥關西道益尊藉有甄陶成孺子

裕兒及門

還從奕葉溯王孫家鄰華岳恣遊屐馬度黃河蹴浪
痕愁絕分攜同皓首白雲紅樹總難論

種花效放翁

秣陵船載百花來買向園林手自栽色映玉蘭依綠竹
香移金粟間紅梅任教夜雨芳菲潤待到春風次第開
種得山秔應釀酒相期潦倒醉深杯

壽石臺四十

爛熳梅花照眼鮮春風觴寄百花前巨源爲憶功曹日
康樂正當擁節年振鷺黑頭宗袞重聽鶯朱芾主恩偏
獨余賸有東山屐潦倒屠蘇媿阮賢

書字與地藏菴僧易山茶

山菴聞道有滇茶大若蓮紅鶴頂砂我寫黃庭渾欲似
鵝羣不換換奇花

壬寅重九後三日裕兒第二子生二首

懸弧又報在章門共喜聯生第二孫桂榮多情芳草閣
菊花有意待蘭尊世傳弓冶承先業迭奏埴篔啓後昆
但得年年湯餅醉儘教笑傲老田園

敢云高大做于門但愛含飴再弄孫未計他年供翰墨
相攜此日對琴尊滿庭朱履皆聞達入座清風總弟昆
昨夜文光傳燭斗一時星聚到林園

贈秋杉禪丈為修復龍濟古刹

老刹松杉護百靈崢嶸遠上接天青懷賢為憶來蘇閣

掃石宜尋瘞佛銘政好開山憑鳥供還期說法有猿聽
一肩交與頭陀去莫負南唐舊祖庭

送陸緯臺司李

蕭然琴鶴伴行舟把酒江天帝子樓每過談心惟白業
誰云吾道匪滄洲棠深閣阜山前思花發蘭陵柳外愁
此去莫言休沐好清華依舊為君畱

送蘇虔撫還朝兼祝太夫人八袞

雙江節鉞渡郊關為羨功成疏傅還報國丹衷今涑水
傳家素業舊眉山樓船三月鶯聲曉鼓角千門鶴夢閒
最是高堂仍健甚錦袍惟帶舞衣斑

浴佛前三日壽孫魯山中丞六十初度二首

園林客過似荒邨花落苔深破履痕元祐豐碑公等在
襄陽者舊幾人存真堪勝敗同碁局盡歷滄桑付酒尊
獨憶斑萊王謝第紛紛遙祝到章門

飛觴無復事常談不朽千秋事有三為飲青精先佛浴

且持白法與禪參

時山菴禮佛

棟花風定鶯聲老梅雨香生鶴

夢酣聞道仙郎郵訊至得分秋訐試泉甘

分惠新茗

初夏攜兒裕同孫魯山中丞董蒼水孝廉遊龍

光寺魯山有作依韻和之二首

水碧沙明疊浪迴江南詞賦不須哀餐來蝶粉皆成屑
結盡鷗盟豈用媒傑閣鐘聲何代寺池蓮春草幾時開
登臨賸有宗雷思入社還應載酒來

一望郊原野色蒼空林雨過日初長山光影樹遙分白
天際歸帆半帶黃往事漫思蘭峪塞同人且對水雲鄉
恒河歷劫塵偏遠汀鷺晴飛散夕陽

張虎別兵憲以奏最行出青原詩見投依韻答

之二首

兩載湖西路山川半屐痕澤仍畱楚甸別乃在章門北
闕紅雲近南牀白簡存應知難久借聊以試盤根
南浦勞勞處高帆向日開魚龍驕鼓角風雨老梅苔暫
假兵符去還期劒履來臨岐尊酒共顧影自徘徊

題周計百耕牛圖

誰將妙墨寫溪山高下疇畬數畝間扣角未聞清嘯發

桔槔聲斷隴雲間我亦薄田寄零水每訪先賢勤仰止
濂溪廳前草不除高風依然見周子周子訟堂案牘空
賣刀買犢古人同盡說今年桑柘好扁舟過我話牆東
要路在前免輪轉第一治行公車滿誠知稼穡自艱難
他日應先問牛喘

代壽海浦隱君

羅浮仙佛共棲真徙倚珠江老釣輪自有瞿曇傳慧業
還從龍馬見精神先朝回牧棠陰舊此日庭階芝樹新
爲說嶺南椰酒美梅花點點介初春

贈僧

結茅偏向大江邊僧臘於今不記年每覺秋風來戶外

常隨流水在門前茶瓜粗辦能畱客鐘磬高懸可伴眠
獨有江邊忘寂寞常聽簫鼓過樓船

秋月送饒型萬都垣還朝

還朝昨歲傳司馬折柳今秋又送君但得夔龍頻接軫
何妨鷗鷺自爲羣樓船八月章江渡風雨三山潞水雲
況是同人咸聽履東南佳氣正氤氳

立春前一日雪泊即事

孤艇泊荒洲不作竟日想豈謂肆狂飈盡夜成浩漭激
浪高如山水粒結爲瑒有若金鐵奔亦似雷電搶豈曰
蓬窗六花大於掌搜腸覓新詩禦寒披舊氅況值小除

日中心正快快且當次孫兒百歲正喜襁倘若至梅山
酌酒同欣賞胡為對殘燭寂寥余獨享強欲挑燈讀燈
燄唯惆恍生平江湖遊何年不來往未若茲行難大覺
異疇曩古人每登陸遊屐著幾緡非若探珠客何必求
象罔聞說小園中移植增長養急當遵塗還春郊正駘
蕩祇自愁石尤久稽亦徒枉冒雪先言歸頗覺吾兒爽

時裕兒
先歸省

秋日寄贈雩都穎仲傅明府兼懷令兄東勃司
農并訂後約二首

一權章江泊心期久與同況逢新令尹轉憶大司農
瀟水湘川接雩峰粵嶺通人傳初到縣四境已清風

曾過訪羅巖高風冷碧杉誰將懷古語謬向石頭劉為
政知能暇勝遊自不凡重來如有念相共發琅函

送郭生洲驛使兼懷吳峻季

霜空桂影簇驪歌尊酒勞勞意若何月照雲帆寒瀑布
秋清晝錦渡滹沱西山渥澤傳郵遠北闕聲華聽履多
寄語瀟湘吳令尹公餘曾否憶嵯峨

虔州寺名
曾同遊覽

汪次華溫智先同舟北上小園話別即席賦贈

二首

明月正清秋聯鑣上苑遊最難逢好友更喜得同舟射
策三千里看花十二樓中流堪擊楫惜別記南州
維舟纔欲發重過細論文三徑求羊到同聲董賈聞微

言存世譜小酌對斜曛並馬長安陌相期報白雲

廣陵司李王貽上遠楫請爲乃翁匡廬先生並
孫太君雙壽率爾致辭遂成長篇時貽上有詩

選之寄

邗上三年別王子素書枉寄平安紙蠅頭細寫乞言詞
高堂雙壽南山時瑯琊華胄自昔盛新城峨峨壯壁壘
公卿袍笏堆滿牀兒孫誰不紆青紫制科有文兼有實
豈龔虛浮競紈綺匡廬先生重經術應運龍飛聖人出
特舉明經對大廷其道真足擬良弼時維方伯年大耋
左右承歡豈踰邾良辰美景奉版輿稱觴撰杖無不適
蘭玉濟楚獨領袖五十孺慕如一日天經地義昭宇宙

家訓琅琅率由舊神龍首見不數飛與雲無心以出岫
養成頭角盡尺木騰霄上與風雲邁九苞之鳳發殊采
世莫能傳鸞乃妬遠聞噦噦如笙簧琴瑟妙合和鳴奏
鳳出龍見會有時河圖大衍發靈秀五五錯綜數相生
陰陽得位三才就我從錯綜觀經緯天人之際惟易授
於今癸卯得槐讖王氏之槐由來茂臯夔稷契旣接踵
元愷才子齊馳驟猗歟休哉此一堂二人春秋富且康
長公有名播裘馬掄才稱職吏部郎仲叔羽翮尚翱翔
季公蓮幕開維揚揚州芍藥金帶圍韓歐發硯於此光
何況風雅盛阮亭岳瀆之精聚詞章先生有文婉泰山
七十二君生輝煌登高作賦稱大夫綸綍寵錫配德將

胡爲神契在匡廬如號五柳景柴桑在昔首山出堯舜
五老爲言河圖當爲應河圖期不偶龍馬精神並日長
金公未老木母健北郭鹿門樂未央百年兒孫俱弟子
堂前簪紱三千行

送簡在叔子和姪公車二首

爲道公車發方舟破浪來長征依柳色小苑見梅開家
久知名士用王湛事朝堪薦異才用呂夷簡事一尊寒櫂晚惜別共
徘徊

拄笏西山日欣看送遠行彈冠新令甲作賦舊家聲天
外騰雙鳳林間聽早鶯黃河同渡馬正好及春生

園居雜詠二首

一抹西山入望遙林林慳石疊層霄幾回欲自登高去
漫倚紅闌過小橋

藕秧分得種新荷水到池塘受不多昨夜一番輕雨過
泠泠細澗起微波

重九小園即事

何必龍山戲馬遊園林竹樹自森修偶攜盡室娛深苑
更共登高上小樓色豔雞冠疑染露香生佛手欲擎秋
黃花爲問開還未畱得清觴幾度浮

疊前韻

領略毋煩選勝遊一觴一詠足清修林疎點染維摩畫
帽落翩翩帝子樓小徑乍成纔試菊半彎初澹已驚秋

移尊每共梅山醉夜色光芬玉露浮

園居即事

偶然成小築為喜接庭除地隘聊偕隱林深與世疎疊
山頻選石問水欲通渠對奕聲敲暑銜杯影動蛛花明
紅玉溜蕉展綠雲舒竹醉磨刀雨香分薦麥魚簾垂和
月卷草長倩風梳景入單條畫閒消數卷書暝煙生徑
遠曉露浥窗虛不羨揚雄宅逃居任毀譽

疊前韻

半畝纔成宅蓬蒿滿砌除畏人辭剝啄得趣任蕭疎繞
石斜通徑環流曲引渠牆危懸薜荔研古滴蟾蜍風亂
蕉聲碎庭空竹影舒開林遙待鶴鑿沼欲觀魚步澀難

尋履

時有足疾

髮稀久廢梳室多酬唱語友斷往來書江溢浮

檣遠樓高得月虛人言茲老異癖不有兒譽

有感而云

甲辰夏日葉天木郡守招同巫巒禊司李讌集

新署兒子裕與焉深夜雨歸賦謝二章

下榻清風邈未聞使君高誼薄塵氛訟庭晝永新鈴閣
諫草霜凝舊惠文采石人同三島月秣陵客過六朝雲
盡捐禮法忘賓主共濯冰壺夜欲分

衙署蕭疎伴鶴琴手栽花樹是棠陰無多暇日閒官況
尚有公餘話客心滿座芳腴羅異饌一林華月照凡襟
攜兒酣醉歸來晚梅雨江天正作霖

次施愚山守憲原韻

寥落江城日為園亦偶然誰云蘭似玉轉覺淚如泉病
讓傾葵智時有孫殤兼足疾愁妨選石眠故人勞念我頻見尺書
傳

送次和內弟之襄陽赴友人之約

之子襄陽去當年奉使過習池曾載酒漳水不聞波者
舊名賢傳銅鞮士女歌歸來還語我風景近如何

石園全集卷第十九

石園全集卷第二十

遺詩二

詩七十四首

夏日園居

滿徑蓬蒿仲蔚園翳然林木似荒邨種花每以無心得
安石寧云有待煩池水驟添因雨過庭蕉亂卷任風翻
拋書一枕渾忘暑睡起還嗔鶴唳喧

歸舟和程士哲韻

螺川偶共挂帆來老去還堪杖履陪鄉夢久思尋夜月
交情真可耐寒梅比年多病惟須藥何處悲秋不費才
每飲談深清漏永江聲坐聽首重回

七夕舟泊龍窩

一棹隨風至雙星此夜過合離同好友清淺問明河野
戶茶瓜少空江橘柚多他年懷小飲記取在龍窩

七夕憶內

天際歸舟落照斜銀河正度始離家深宵野柝和砧杵
遠水空林拂荻葭欲起雲雷懸蟬螿時虹見知同兒女供茶
瓜蛛絲乞得皆成巧想見梅山笑語譁

秋日王鶴溪郡丞招飲西昌公署有作

越三日後是中秋對酒當歌紀勝遊澤有歸鴻傳白下
名同司馬重江州小山叢桂花爭發棧閣臨江水漫流
讀罷新編良夜永公有因槐集園林高臥足淹留

王遠度招飲仍用鶴溪郡丞韻

蚌胎漸滿欲分秋又向春浮續舊游偶爾開尊傾北海
依然下榻似南州風生鳧影清輝徹雨濯蟾光碧漢流
却憶白田菱蟹熟深宵對話倍遲留

偕同年劉平田重遊春浮園感懷仍用前韻

春浮一記自千秋每到重遊未忍遊曾憶芳舟同北道
可堪華屋詠西州蒹葭飄渺人如在林木蒼茫淚欲流
幸有阿咸能繼美園亭無地不堪留

中秋之次日和鶴溪郡丞夜集

園林似覺得秋偏皓魄還矜昨夜圓小飲祇疑能醉月
深宵何地不忘年侵人衣被分涼露畱客茶瓜薄綺筵

時余茹素為說滿城簫管起清光照徹自千千

疊前韻

偶上高城忽有樓凭闌四望水悠悠光浮白羽疑含月
影漾丹楓已醉秋雨過煙雲斜照起風生蘆荻晚帆收
螺川不盡尋行處何必名山賦遠遊

研鄰與劉平田畱連十日時值中秋二首

何必登臨去家居儼畫圖時花隨意發古木盡情敷藉
草驚鴻雁穿林見鳳雛小郎時戲花下徐卿還可詠漸喜識之無

孟昉次子初生

貪看連宵月放舟不厭遲每披藏鑿物如對漢秦時小
飲兼行藥微吟欲代綦芙蓉江上好恰是客歸期

秋夜過飲曾和卿即席偶賦

猶然宅近聖人居尊酒談心倍起予對月渾忘今夜永
聞歌尚憶廿年餘庭階競秀堪娛老松菊猶存好著書
我欲還家同卜隱歲寒耐可慎終初

別李彞中二首

雲間李確菴同年之子

公子翩翩是鳳毛文章聲氣重吾曹偶來相晤旋分手
為泛秋風一葉舸

夾岸笑容快勝遊蓴羹鱸膾泖湖秋殷勤尚有重來約
遲爾江天帝子樓

題季遠之看奕圖二首

拋却塵緣付一卮閒來袖手坐觀綦君攜短具東歸去

好向山陰問獻之
圖中三子君其一二老能分勝負無試聽深宵姑婦語
誰云國手盡眉鬚

秋日園居

日涉園成趣無煩屐齒勞
花絲疑礙地山小亦登高
問字臨鴻乙當杯佐蟹螯
忽然秋思遠有夢到江臯

元夕小園散燈

燈火居然不夜城
小園春色倍分明
斜侵柳眼螢千點
亂落梅花鶴一聲
池影風翻巖壑動
樓頭月過斗牛橫
傳柑甚遂登高意
玉漏頻催酒滿傾

題玉樓春

一枝嬌豔壓羣芳
雨濯香生簇曉妝
爲喜玉樓呈麗色
高懸翠幙護斜陽

春晚畱陳伯璣二首

偶下高人榻挑燈夜影寒
交情珍澹漠花事任闌珊
閱世懷新遠論文稽古難
何當頻過我取醉送春殘

柏亭深夜語豈盡爲情親
夢響鶴驚竹柝嚴
官在鄰

近居署紅歸三月雨
綠老一園春
修禊來朝約誰爲賦洛神

程士哲讀先封公阡記有詩依韻答之

雲山鬱望正因依
束帶躬耕願每違
十里松楸猿自嘯
千秋華表鶴能歸
何人泣露金盤冷
有里談心玉麈揮
讀罷荒詞還得句
九原欲起倍澄輝

甲辰七十初度效放翁體

拂袖還山十載餘行年今始及懸車齒搖只合頻呼飲
臂痛猶能不廢書賸有閒情營竹石從無生計到田廬
眼前幸得兒孫樂敢聽人來誦九如

贈曾和卿二首

蕭疎微雨蕩晴和一櫂歸來擁素波芳草漫驚搖浦漱
荒城爲喜聽絃歌人言渚遠鴻思集我愛庭閒雀可羅
偶欲尋幽懷點爾春風沂水近如何
幾年拋却老儒冠選勝林居賦考槃賸有芝蘭增馥郁
不妨詩酒足盤桓錫羹正美鶯聲嫩槐火纔新蝶夢寒
何日鑑湖仍對宇煙波欸乃共漁竿

題垂絲海棠

弱質垂垂淺澹妝醉酣無力到昭陽妖嬈著雨芳肌潤
搖曳迎風錦帶長蝶欲戀花難穩步蜂疑采葉別含香

海棠無香

效顰爲笑三眠柳空裊柔枝過短牆

春日壽于岸七十

西山有長松亭亭凌百丈流膏歲寒滋蒼穎春風蕩誰
取以名堂雲霧悒夙尚始知南州士不獨在昔曩萬軸
擁牙籤古今憑下上偶司鹿洞鐸實因當路強人言媿
蘇湖寧堪羈塵網仍返我東潭何異居西灤手拍洪崖
肩行披王恭斃月旦王彥方冲逸左元放詞賦曹劉並
書翰顏褚倣秦漢恣窮披金石發幽賞難弟晉銓樞勳

名振天壤視之惟曠如長笑戀林莽今年屆七旬骨氣
清且朗鬚眉霜雪侵澹泊神仙養余同叔向遊伯華今
無兩似若有神交每不靳弘獎或讀扇頭詩或光庭額
牘寤寐思見之寸心如恂怍如何入雲深祇作天際想
余亦白髮翁年慙百日長可許成二老風流堪來往鶯
花正明媚章江一榷訪尊酒話長生毋令隔山仰
小園同內人賞芍藥聞畫眉聲志喜
急呼春釀賞芳叢芍藥新開幾朶紅爲愛畫眉調語巧
聲聲疑喚白頭翁

祝宣城吳叟

子稱三鳳起人是六旬餘家世傳醇樸生涯問烏魚風

流江左句煙月水東居坐對敬亭色長懷自晏如

題醉花池

春風澹蕩碧華滋鳥語花香自一時傳說遠公休禁酒
淵明來訪不攢眉

方敦四初度兼有嶺南行

何當初度日又復嶺南遊岸遠驚梅雨灘空響舵樓從
來弧矢志不作別離愁爲問韓蘇迹高風幾處畱

園居聽雨

綠窗蛭沸亦何爲厭聽檐聲不斷澌偶學坐功妨熟寢
難痊臂痛誤庸醫篋管迸砌爭辭籜躑躅扶籬亦豔枝
却令小僮頻報水一番雨過一盈池

夏日園居

悠然成假寐物累盡情拋好鳥鳴深竹新蔬佐野庖花
鱖香不定樹密影全交坐聽蕭蕭雨流螢綴短梢

春夜同遠山看月小園有作

難逢今夜月攜手小園行花落能香石春歸不待鶯未聞

鶯聲深林藏鶴老淺沼泛鷗輕坐對頻移榻悠然浥露清

送楊岑丘歸越

雨過花香綠滿庭每逢著屐款款局鳧飛震澤原仙令
鷗泛桐廬亦客星六詔風煙滇水遠五湖吟嘯越山青
囊中別有還丹祕會向深巖采朮苓

題張總督園亭二首

花間聽事水間亭曲徑長廊萬竹青檻外葵榴資嘯詠
階前蘭桂度芳馨娛親晝永輿堪御報國功高石可銘
自是公餘多暇日百城卷擁重台星

每遇平津醉兕觥依然燕雀荷生成庭花雜植雕闌迴
湖水頻添畫舫輕閒倚長橋賒月色時臨古帖聽書聲
四郊風靖農桑美坐對林園曉露清

讀張蘧林司馬前因後紀二首

浮生如寄耳何處問前因一死傳三烈千秋續五人姑蘇有五

人紅香青史豔紫塞碧燐新惟解同心結泉臺夜夜春

寸寸縫綦履悲深淚共吞但知存父節敢復望君恩

衣帶銘猶在迴環偈可論先生今返矣真足慰芳魂

送王在茲觀察之任寧紹

西臺風采著驄車偶借潯陽重隼旗孺子幸叨門下士
高軒每式野人盧新銜簡命山陰道悵別章江五月餘
聞說蘭亭今好在扁舟訪戴意何如

夜詠牡丹用遠山東湖韻

高齋簾卷暮雲收何處香生酒氣浮自可凭闌賒月色
毋煩移檻作春遊紅分芍藥猶含豔紅紫尚未開澹似芙蓉先
報秋粉紅先開為愛化工偏解事今年添結小重樓花較去年甚茂

暑甚同黃伯圓橘林小酌對奕

散步因逃暑深林且息機藥緣郊外采時采蒔蒼草棊向橘中
圍水涸灘聲咽日高樹影肥呼童攜小飲坐久憺忘歸

寄懷傅度山掌科兼訂後晤

別來不記年相思渺雲樹鱗羽一何慵離索積情愫偶
作麻姑遊水涸斷江路停橈覓小憩火雲爍赤霧祈霖
束皙歌病暑歐陽賦念我平生友翠雲深處住傳聞矍
鑠翁顏色如童孺川巖恣徜徉著述仍屈注欲放剡溪
舟磽确杳難渡且了看山約中懷苦迴互待到秋風生
歸途期良晤定泊長橋側握手為道故王謝多遺蹤遊
覽隨杖屨更餘雕蟲技玄晏諾有素杯酒話殷勤閒消
幾朝暮藉茲郵寸心欲去還回顧

贈司世掌都閩

年少曾投筆雄心老未刪詰戎分楚閩轉戰度燕山劔

倚邊雲冷身畱箭血斑古來名將傳勇退幾人閒

贈表在田守戎

汝水中權勁威名遠近聞金張前戚里衛霍古將軍
劍氣凌秋月弧光冷夏雲 聖朝方右武努力策崇勲

宿藤橋羅仁及家二首

名興讓文
止族子

論文自古盛臨川四子聲名昔共傳咫尺羅坊人去遠
殷勤猶得讀遺編

盱江取道宿藤橋滿路祈霖暑未消幸有儒生堪對語
寒山片石足清宵

欲遊二姑暫憩南山古寺偶過苗九符明府衙
齋話舊見碑刻楞嚴閣韻走筆和之二首

入寺方休夏遊山尚選辰冰衙閒話舊玉宇遠懷新樹
古風生葉閣高暑避人蕭蕭微雨過亦自灑芳塵
幾行疎竹翠一徑小花然敢擬星為客還憐吏是仙有
心哉擊磬懸有石磬無語也談禪想到當年事黃虞未老前

題聞一琴僧像

古寺深宵寂孤桐發疎越猿嘯落幽泉廣陵豈終絕微
雨忽來過空庭浸明月試看彈者誰老僧顏似雪

南山寺松下避暑

冒暑尋幽事亦奇江天雲樹晚參差水生斷岸舟初動
日落高林座屢移梵刹喜同僧夢歎山靈空訝客遊遲
汲泉未解相如渴坐隱閒消一局碁

遊景雲寺

且遲著屐問麻源徧訪名藍野外邨
偶過長橋尋佛閣欣看老樹擁僧門
藤蘿自繞香山古碑碣還珍御筆存

寺石先帝
刺敬佛二字

為問遠公何日到相期話到敵煩喧

竺菴
將至

題黃伯圓畫二姑圖

欲作二姑遊幾年勞夢想一落高人筆
歷歷如指掌若窮三谷幽如聽雙泉響
明朝從杖履未到神先往

雨後坐月同黃伯圓鄧幼立張武仲鄧弼子吳

瑞郎諸年丈僧語松間一崐隱

香焚柏子坐深更古殿庭空受月明
野水添流歸絕壑良苗過雨潤新秔
雲璈奏冷遊仙夢禪版敲殘念佛聲

欲覓桃源何處是擬登峰頂問秦人

和同年蔣八公相國壁間韻三首

連宵一榻寄仙家鞭背何緣癢欲爬
盡說山中題詠滿

曾無人及玉蘭花

千古瀑聲未歇雷石盤屈注小滌迴
老龍潭下呼難起

莫問仙源何處來

蒼鱗久去一壇孤作記真慙古大夫
莫訝方平仙迹遠

茲來曾有蔡經無

香海菴

有兩宦菴
焚修其中

女伴麻姑正爾宜偶從香海問毘尼
孤臣自了當年事雙節猶存異代思
鐘鼓何心歸梵刹冰霜豈盡在鬚眉

我來恰遂尋幽約增得遊山一段奇

雲門寺二首

隔嶺是麻姑紆環坐玉壺深松千嶂晚敗寺一僧孤螺
黛盤雲髻虹流濺雪腴高岡華子在恰敵輞川圖

一水層巒劃千崖削壁劖丹青懸洞壑薜荔覆松杉石

磴詩畱碣

寺有謝靈運詩碑

雲門字勒巖

石上雲門二大字

歸途行向夕幽

籟寫韶咸

鄧幼立弼予二年丈載酒靈谷同伯圓醉吟

萬疊危峰擁屐痕靈源雞犬自邛邛環巒徑險紅關護
繞澗泉流碧浪奔日照山頭巖是洞雲深谷口石為門
空歸只恐桃花笑一醉高亭且盡尊

為百歲翁王華宇題像

綠髮方瞳不老身一經點染更精神茲遊我自矜奇絕
親見盱江百歲人

贈百歲翁王華宇

寄迹南山寺忽逢百歲翁寬長惟兩耳精彩是雙瞳齒
豁言猶爽貌癯聽少聰扶筇真矍鑠執禮甚謙沖飲水
郵仙瀑佐餐食野菘不知何導飲寧復問烏熊兒女皆
耄耄年華指柏松家餘青紫業人有上皇風久習岐黃
術閒攜芝朮籠嗟余慙老大對酒似童蒙診脈心能細
書方字且工為言多壽考亦自破鴻濛遊屐尋山徧頽
顏借酒紅還增三十載即欲與君同

飯景雲寺同竺和尚徐仲光年兄苗九符令公
梧葉初飄動寶樹香林一飯對毘耶宗風提唱人難老
蓮社棲遲客是家會有高朋同杖屨更來仙令共茶瓜
最容易到誰閒聚乍聽秋聲坐日斜

苗令公招遊從姑山同徐仲光

孤峰峙東南一岡兩水共壁立綴層霄懸空勢若拱玉
竇鐵爲關輪困還圓縱毛髮無遁礫紺碧爭磨礧仰射
玄壤匯倒流滄波凍徑東天亦小窺來特一縫羣峰萬
馬奔到茲噤不闕我來值初秋暑行尚恹惚大令一舄
先二客雙鸞控異木帶淙聲清瀨恣漱弄坐對古賢祠
高風餘梁棟拾級步步齒齒林響崖光動江帆落深罅橋

危心目恫雨過再躋攀箕踞聞鳥哢開元天寶語盡破
塵凡夢偶爾評兩姑以規不以誦一驚泉爲瀑一踞險
爲峒屈宋豈衙官魯衛堪伯仲灑氣競磅礴誰正抑誰
從欲援易名典爲補名山封環珮鏗相接平奇互爲用
時近七月七鶴馭行當控矯首問仙子談言或微中余
家有小園雲根撫錯綜巨鼇倘飛來取作怪石供

別語石禪僧

地抱雙江古木稠浹旬一榻寄清幽閒尋蠟屐常衝暑
忽聽蛩吟已到秋七夕正當仙馭過二姑似向客帆留
殷勤執別爲僧語高閣成時我再遊

贈瞿峽僧僧能詩善圍碁

課誦焚香二六時翻經有暇更裁詩勞勞世路塵緣客
不敵松間一局碁

聞一僧

老僧高隱白雲深
皴瘦閒將畫譜臨
一曲孤桐江月曉
高山流水映禪心

語松僧

幾年瓢笠出山陰
行脚遊時不廢吟
我欲探奇來禹穴
雲門何處好追尋

過石門

酷似余鄉玄潭

屹立中流碧水灣
石門斜日聽潺湲
扁舟一葉隨潮去
如在玄潭雪浪間

宿麻姑壇

兩宿丹霞洞荒涼
古殿危香生雲度
後雨過月明時
家夢隨鐘發泉聲到枕遲
似聞仙子語欲索遠山詩

歸權

經月別羅幃秋山送落暉
友朋空對酒兒女想牽衣
客久囊宜竭吟多貌不肥
入門應笑我白髮一郎歸

冬日送王鶴溪郡丞謫歸赴補

題軾寧多日祝轅且共攀
分符蘇玉局司馬白香山
宦況同雲冷詩情載月還
離懷何所似鷺水日潺湲

病中施愚山過訪兼貽佳句依韻奉答二首

病間方舒眼倦看愁聞檐溜響驚湍
園林賸有梅花發

一任橫斜照水寒
空谷蹙然少足音
投來佳韻見情深
翟門忽擁高軒過
力疾難賡白雪吟

石園全集卷第二十

石園全集卷第二十一

遺詩三

詩五十九首

寄題愚樓二首

風高閣阜接遙汀
盡說登臨似敬亭
好句驚人誰謝朓
開尊對客幾瞿矍
憂時每下窮檐淚
懷古重鐫座右銘
吏散斜陽歸鳥外
隔城漁唱晚煙青

曾從瀟水上
愚樓奔赴煙嵐
一望收古樹環橋
分黛色

樓鄰學宮長江入檻與雲流
遊情屐滿千山雨
宦况寒生五月

秋匝地橘陰堪對酒
懷君祇擬在滄洲

為蕭偉度題自畫圖

何事相逢晚目披自畫圖同君形共影誰謂我非吾身
外原無物衣中自有珠蒲團跏坐久莫問半全跌

送同年劉平田歸里四首

不蹋南州路知君已十年胡爲移小艇忽爾泛遙天春
草繁宵夢新槐破舊煙柴關纔一啓握手便欣然

小圃花開日深沐客過時尋芳還念友問病且攜醫往
事談偏劇他人聽每疑久懸高士榻祇與故交期

共有幽閒趣還同逸興添見君惟澹漠媿我尚廉纖對
酒杯難再飲止一杯尊生味不兼食不兼味風流成二老來往自清

恬

聚言今正好何事起離愁籍甚千秋誼空爲十日留鶯

花撩別緒風雨送歸舟無限情難遣心隨到鷺洲

寄題孫北海少宰退谷即次見懷韻二首

風煙邈爾亦何依生事於今愈向微浦水漫言聊卜宅
文江到底未成歸看山老覺花迷杖對酒空憐月滿衣
忽憶故人天際遠寸心還傍五雲飛

紅泉翠壁自因依枕祕名編結響微有景祇宜同客醉
何遊不是傍僧歸嵐生谷口通蕉夢樹落泉聲冷薜衣
話到山公當日事接離仍倒羽觴飛

丙午夏杪裕兒公車北上兼攜妻子省其外舅

舟發章江詩以示之二首

老來但望汝成名忽令牽裾事遠征母共含情孫與子

兒憑侍養妹同兄關河萬里凌雲度書劔千山帶月行
朝夕眠餐須自愛家音頻寫寄江城

知兒難別是雙親維纜江干又幾辰細雨頻添滕閣水
好風吹送帝城春問年恰已齊蓮洞念翁論世還看繼錦

鱗老晉慶澤吾家原不淺勉旃行矣對楓宸

送林確齋歸寧都二首

聞聲纔見面正好話心期君即留多日余曾見幾時情
深偏止酒病久漸疑醫分袂秋江上閒心與共持
我有梅花研摩掌可自怡何期高士侶惠教易堂詩古
瓦增斑駁新篇倍陸離幾時同握手共讀灌城碑

初秋近和張日葵廷尉舊詩兼簡枚卜事

先臣猶記共南冠絕口從前懼損歡偶簡遺編畱竹素
不堪老淚泛情瀾當年空有關閩累此日誰登李杜壇
忽訝秋風初入戶蕭蕭細雨足閒觀

七夕立秋時裕兒湖口家書至

泛泛輕帆事遠征每當風雨倍關情家音初寄青山側
客路行經白下城橋度雙星浮漢水月明一葉下秋聲
相看乞巧憑兒女坐對涼生斗柄橫

冬日送孫魯山歸皖江二首

攜得梅花過嶺來相逢懷抱又重開挑燈細讀南華草
對酒閒傾北海杯每共連牀聞夜雨還期並馬聽春雷
殷勤分手情難極笑指寒江一棹迴

粵歸不及尉陀裝解贈曹溪構法堂自有三山供杖履
寧云道路飽風霜駐顏老得還丹設賭墅情耽坐隱方
歲事崢嶸人去遠皖桐煙樹正蒼茫

贈崑隱還粵東二首

忽然脫却舊袈裟經史閒翻換法華歸去家山春事早
仍從嶺表問梅花

不竟空禪大小乘儒門亦自有傳燈前年記得盱江寺
赤脚蓬頭苦行僧

丙午冬雪

瑾臥蕭然歲欲除忽驚小院集瓊琚簾凝柳絮詩偏好
研冷梅花賦自如余有梅花研任我圍爐閒對酒憶兒映讀夜

翻書

時裕兒公車

朝來却喜晴光動漸看春風到草廬

石門偶現梅崖第一峰字喜賦

石門列峙破苔封突出梅崖第一峰飽歷風霜深日月
奇藏筆墨走蛇龍好懷漸覺春來集勝事偏於歲月逢
如此真堪袍笏拜似從鏡下兆笑容

春仲送以理姪東下二首

輒爾輕言別江城不少留乾坤雙鬢短煙雨一孤舟芳
草秦關路荒陵渭水頭從來宗誼重行矣倍生愁
小園頻對酒共喜不爲官世事惟碁局閒情任釣竿人
矜遊覽勝老覺別離難幸有重來約結鄰可盡歡

送周計百之任雲中郡丞二首

積雨泛行舟輕橈未少畱江深寒五月道遠望三州官
以籌邊重灘因歷險道盈盈惟握手一水酌金牛
意氣如君少離懷莽不刪提刑周茂叔司馬白香山十
載辛勤度千秋水石閒眼中吾老矣何以慰轅攀

初夏過瀟江夜宿河口對月有懷施尚白觀察

幾年不蹋瀟江路片帆風雨衝煙霧花落鶯啼春已歸
但有江山尚如故使君一見眼倍青傷心民隱淚霑襟
名流圖畫盈素壁小酌閒來坐就亭就亭景物居然好
牡丹開罷石榴早謝公佳句自驚人江淹才盡媿吾老
傳聞河頭大搜舟將軍投鞭欲斷流急呼小艇揚帆去
回看惜未上愚樓行行逆溯急湍水古樹木立見衲子

知是此中有名藍天黑徑險行且止須臾停橈傍人家
昏暮洪濤亂飛鴉野磬一聲傳古寺依微月色照圓沙

和胡三山司李吉署倡和詩二首

蕭疎官況靜無塵法署閒閒任莽榛檉柱生香金粟老
菩提落子露珠新

公善養生試看鳥啼人散後繞窗竹樹每分鄰

無煩搔首問青天為說磨磷愈白堅訟簡祇應頻客過
梁空惟見有魚懸恤民不減三千牘愛樹爭傳幾百年

鷺水螺山畱夕照一時遙集草堂前

題許堯文郡齋并為祝觴送行四首

翳然成美構總不似衙齋圖畫皆名蹟觴吟盡古懷庭

花紅繞砌鄰樹綠分階六月冰壺裏幽深意每諧
知有仙期在公有期吳門想像中榜聯移故里雞犬識新
豐池溢斜通竹芸香靜引鴻更聞檀板小曲曲度迴風

公有小
歌侍

清泉酣惠釀美饌飽郇廚客自容嵇阮官仍是白蘇山
川今鷺渚煙雨舊鴛湖兩地甘棠茂聲光滿四衢

為喜懸弧日行當執玉時祝觴凝燕寢曳履動梁恩鄉
月隨車遠彤雲介馬馳翠華新御極歌舞拜恩私

居家三日得文信國羅文毅鄒忠介三先生真

蹟喜成一律

偶集先賢蹟淋漓發古香慨然思異代況乃盡同鄉字

挾風霜氣人爭日月光茲遊殊不負世世付珍藏

遊大覺菴二首

三十年來江上寺探奇今喜又重過漫言滄海桑田改

依舊青山綠樹多結社高人思惠遠散花天女病維摩

時主僧寄
幻病痘

偶逢老衲閒相識為話從前一放歌

遇智林
老僧

當年曾欲買平園為愛林深靜不喧野水仍能留舊雨

閒花還自媚荒墩

茶花雙
株仍在

難尋刻竹題詩迹恍憶登山著

屐痕何日重來還選勝素螺高處結層軒

華亭董宗伯為余書司勳時綸章三十餘年今

阿咸乃以見寄亦奇觀也感賦

先朝章句及司勳異代風徽邈若雲豈謂黃麻傳鶴水

忽驚紫誥煥龍文翰留史筆千秋重恩拜彤墀兩世芬
知有滄桑神物護寄將遠道倍殷勤

贈南岡獨立僧

每讀涇溪記南岡古寺傳偶來憑杖履薄暮澹雲煙紺
殿新鐘鼓蒼松老歲年天親無著好兄弟共安禪

指秋杉

送張葵軒總戎歸上谷

曾從宥府紀崇功萬里河山指顧雄銅柱自應標海外
牙旗忽見返雲中元戎小隊欣相過橫槩新詩調轉工
尊酒分攜無限思扁舟東下意何窮

送公湛姪之滇南二首

記別塘西日今經已七年忽移章水權猶帶秣陵煙及

我稱初度同兒醉舞筵可堪容易去驅馬入黔滇

正喜還家樂胡為賦遠遊蠶叢千萬里吳楚一孤舟梅

柳催殘臘江天冷敕裘惠連春草夢應早到南州

雪天葉天木郡伯招同黎博菴鄒謙受暨兒子

裕讌集衙齋有作二首

郡齋每念山中客折柬招邀悵晤言會有園林窮勝事

還將檀版佐芳尊寒梅豔吐傳春早古篆香生入夜溫

座上真堪賡白雪一時星聚醉平原

攜將孺子坐深宵共集冰衙破沈寥滿架蟬光浮几席

一庭鶴羽拂煙霄霜稜為憶留三竺風韻猶疑帶六朝

坐久渾忘清漏徹歸餘斜月挂嚴譙

初夏雨後遊青原山六首

為惜春歸去，翛然作勝遊。野煙橫古渡，曙色引芳洲。雨足山農喜，雲開客興遒。籃輿經過處，步步躡清幽。

曾同天界語，薪火喜頻傳。嘯公藥公皆浪丈人付拂祖塢靈巖護，名書老

額懸。時重立文信國青原山扁荆枯新得枿。古荆發新枝瀑隱始通泉。瀑布為藥公新開幾

夜深燈語疎，鐘伴好眠。

青原青未了，把臂入林深。路折皆逢渡，山環不辨岑。高崖奔遠瀨，怪石冷斜陰。嶺外樵風發，松林起梵音。

泉聲方到耳，山色為驅車。錫響龍歸鉢，筇飛虎避廬。捫蘿驚老健，坐石話清虛。上下皆三疊，匡山但小如。

茅菴成午憩，一飯結僧緣。清又菴飯開徑人何在，嘯公磨崖句可

傳。愚山筍燒雲外玉，茗煮雨前煙。歸路非來路，溪流合一

川

老僧閒未得，苦為衆生忙。搜瀑資遊屐，耕荒補衲糧。兒

能詮物理客，可讀炮莊。二書皆藥公所著隔嶺浮山在，依稀是故

鄉。時藥公有歸皖意

雨中登慢閣次山谷先生韻

江流不盡古今聲，為慢登臨豈待晴。遠岫封煙餘澗落，平沙過雨入帆明。忙啼布穀耕犁劇，欲上鮒魚釣艇橫。往矣先生遺韻在，千秋可許結閒盟。

偶讀白香山集效其體

鳴鳩乳燕總關關，偶過蕭齋得少閒。隨意行園皆奪目

有時對酒一開顏尋僧共飯湖邊寺對閣同看雨後山
住久漸忘誰主客畱連十日不知還

贈白下顓孫明府

閒從杖履過西昌滿路絃歌挹令香好雨趁時農事起
深宵對酒客懷長風流太史存高閣閣悞世澤先賢紀掘
坊明府家峽水澄江衣帶耳為言兩地盡甘棠

重過研鄰五首

賸有湖山約重來豈厭頻乾坤餘老眼水木趁閒身檐
際林鶯亂階前玉樹春如茲堪靜對不似在城闈
西郊凭望處一到倍蒼茫悵意新亭閣遜圃傷心舊草堂
春浮鳥聲喧晝寂佛火接林光四月偶爾同僧飯樵歌過夕

陽

久漸忘歸去眠餐得晏如移情攤古帙借讀有奇書櫻
筍薰風候茗香午夢餘微吟呼小飲花下摘時蔬

即以園為宅因之徑繞廊層臺浮曲檻複閣影危檣可
續名山記還鈔種樹方吾園亦好在分接且成行每在研鄰分移

花樹

到每逢佳節非關選勝遊興來隨往返老去任春秋忽
漫驚榴火還堪浣客愁偶聞新漲發一櫂下南州

飯般若禪林前曾寓此

禪房曾借片枝安此日重來興未闌古寺依然圍薜荔
空階還見長琅玕兼旬尚有春遊樂一雨能生夏日寒

老衲知余仍健飯殷勤細語勸加餐

夏日同曾旅菴納涼取亭

欲鼓章門權同維古寺舟頭顱皆老大來往尚風流四月黃梅雨雙江白鷺洲攜將新茗至酌水泛金牛

王青蓮赴補入都招同夏抑公餞別小園有作

之子千秋契長懷惜解攜悲歌燕市遠風雨大江西擊

楫驚簫鼓雕蟲媿棗梨

時為余刺集

臨岐何以贈悵望五雲迷

石園全集卷第二十一

石園全集卷第二十二

遺詩四

詩五十八首

癸卯五日即事時初二初四為內人及兒子裕

誕辰因以志喜

半畝園亭偶卜築怪石參差花馥郁老桂蘊香依古崖幽蘭迸箭射新竹遊憩幸無登頓勞斜闌曲徑連庭屋朝夕攜手往還餘編籬汲井課僮僕焚香酌酒共談詩小窗深夜聞兒讀對月時聽鶴唳聲法書名畫翻幾軸孫男孫女攜抱來更同小姑字六六或覓棗梨相競嬉或登山樓爭徵逐茲值令節屆天中葵榴紛豔光奪目

闈閣正當設悅辰合室人效華封祝况逢時雨足田疇
秋成可歌豐年穀連宵霰霰響高檐欣欣向榮滋林木
不須仙翁藕如船不問王母桃幾熟芝樹滿前真堪賞
大家滿泛蒲觴綠又值次兒懸弧旦歡然烹鷺更餐玉
還從江頭看龍舟水碧沙明映晴昱合室尊幼恣快遊
微酣笙鏞小啟筑人生行樂須及時所貴庭階盡雍睦
大兒家來次兒喜承顏膝下水與菽何必賜出大官膳
何必歸遺細君肉只須痛飲讀離騷荷葉好栽山居服
但願年年如一日天寵有待歌第祿

送楊集廬之任東明

幾年振鐸對匡廬為愛匡廬好著書偶爾彈琴莊叟地

仍同問字子雲居鳧飛緱嶺梧聲近馬渡澶淵月到初
南北風煙惜別遠政成望望寄雙魚

送趙子服憲副之任蒼梧時己亥至日

章門霜柳浥晴芬憲節西馳赤水濱為憶山公曾啓事
欲看太史正書雲隴頭好寄梅花賦嶺外閒賡鈇鉞文
莫謂桂江春色遠上林鶯囀甚思君

友人黃伯圓為彥德老和尚圖小像神情畢肖
真得意筆也喜題一律并以補祝

七十年來百念休半從僧臘紀春秋翻經自可依松下
說法還應點石頭尚有兒孫娛白髮不將桑海問橫流
餘閒悟得長生訣又向金丘頂上求

時皈依
道人

贈柳敬亭

數千里外能相訪何事匆歸不暫畱舌底彈箏皆史冊
尊前擊筑總陽秋到時政好尋黃菊別日何堪對白頭
同是老人君更健相期來往共風流

秋晚家園小讌

秋光欲度小春先盡室歡娛景倍妍燭剪西窗黃菊雨
尊開北海碧梧煙兒孫繞膝人偕老簫管當筵鶴共仙
獨有歸帆行路遠寸心猶繫五雲邊

時兒婦同聯
孫將北歸

又匡四弟有吳越之遊書以贈之

行年甲子已逾周何事猶成汗漫遊曾以鳴琴聞海國
可堪彈鋏出江洲風煙滿路誰青眼兄弟相看共白頭

莫戀湖山閒眺詠還期早晚促歸舟

送葉郡伯東歸二首

一棹下江東千秋疏傳同交深文酒外人老別離中歸
但攜琴鶴湖仍紀雪鴻衝寒梅欲放行矣企高風
小園頻過我君豈似今人忽際書雲日偏當折柳辰還
家王謝宅懷古晉梁塵不盡并州誼重來好及春

祝蕭孟昉五十二首

有約集江臯懷思冷敕袍言逢之子壽偏益老夫豪聊
重交情舊經營世業勞問年纔半百已可賦崧高
歲晚梅花放春回竹葉傾斜川初得句悵閣有餘情風
雅承先輩蒼茫任世情祝觴饒好語且自羨徐卿

題房儀凡先生崇祀編
劔江紫氣自秦關為述先公涕淚潛崇祀式堪光俎豆
表忠真可壯河山如生此日燐猶碧誓死當年額未攀
珍重長留遺草在千秋芳烈照人寰

和賣船行

前年君向瀟灘別孤櫂秋空載明月今日君從宛陵來
春江澹蕩浮一葉握手相看倍惘然小園酌酒花爭發
醉餘偶讀賣船行曠懷歷落真奇絕廉吏可為不可為
即有一船留不得但覺船去清風留湖西雲樹互明滅
世事翻覆等飄蓬傷心民力益云竭嗟哉文水政陸沈
萬家將無炊煙突中流望望濟川舟先生忍視如秦越

許堯文郡丞過集小園有詩見投依韻四首

小苑無多地迴環有路通梅崖何代字花信幾番風曉
樹浮煙碧春山帶雨紅高軒時過我把酒挹芳叢

研北鄰仙市城南隱杜川為遲雙屐到頓令百花妍徑
轉鶯聲怯巢新燕語鮮小伶纔度曲不揣漫當筵

賸欲留春住春光去已多棠梨開社鼓觴詠被池波期
友頻移檻看花約渡河

河外三洲
桃花正盛

公餘還自暇處處擁笙

歌

知共香山興誰賡洛浦吟薜蘿荒野徑風雨暗遙岑花
落園林繡晴生草木陰閒遊良有以攜手話燈深

送丘慎清之任貴竹

執法西風舊有思，
可堪重過賦將離。
鶯花夜雨芝蘭社，
時與兒輩締盟桃李春風被禊時。
萬里蠶叢蠻峒語，
九溪鳧舄長官司。
行行莫歎前途遠，
且聽驪歌對酒卮。

上巳先一日，
幹臣翰學看花小園，
以詩見投，
依韻答之。

春寒惻惻柳裝綿，
雨過花前幕紫煙。
對景漫言千日醉，
感時但覺寸心懸。
有感時事玉樓香孕開還未，
金谷詩成罰不先。
爲續西園饒勝集，
風流太史邁羣賢。

送花二首

曉起看花花亂飛，
聲聲啼鳥綠陰肥。
殷勤惜別愁無柰，
似約青春作伴歸。

小酌花前欲餞春，
殘英落砌豔芳塵。
呼童莫漫輕搖折，
畱向筠籠贈遠人。

連日借諸老小園看牡丹，
并過宗伯北樓酣賞，
漫興二首。

晴陰莫定且尋芳，
老眼看花興倍狂。
蝶夢乍驚愁宿雨，
蜂脾帶露落新香。
疎簾晝卷春三月，
小閣宵分酒一觴。
東晉風規猶可續，
還隨白社濫詞場。

開盡名花又一春，
花前相對總閒身。
甕頭覓酒當杯滿，
坐上題詩得句新。
紅襯輕煙堪作幕，
綠生細草漫成茵。
樹頭黃鳥知人意，
也送清音趁此辰。

和黎博菴學憲

小小園林亦自花敢同閨苑鬪餘華宗伯園名但隨勝侶三春

賞應聽詩人二李誇朱張二公皆有二李句素鶴圍雲空澹蕩杜鵑啼

月任橫斜繡球杜鵑二花並開忙期少長頻頻聚莫道東風羯鼓搥

元日喜雪試筆

東風律轉瑞年華老賦閒情興倍嘉拂曙雲光侵曉色

凝寒雪影亂梅花屠蘇後飲還成醉歌舞新教任自譁

繞膝兒孫堪舉案北歸悵望尚天涯

立春日亦園家讌時有微雨仍用元旦韻

依然水木湛清華春到園林處處嘉萬韭凝香堪佐酒

笙歌吹雨漫飛花庭階賸有天倫樂衢市欣聞士女譁

老去尚餘筋力健年年玩賞政無涯

送施愚山次韻

小園每過得開顏捉鼻從今恐未閒一棹江湖南浦雨

千秋壇坵敬亭山重來政值尋春候茲去仍看載月還

話別分攜頻徙倚難隨杖履共轅攀

送沈方鄴之粵東四首

謝朓青山李白樓扁舟何事向羅浮笥中知有驚人句

似挾飛仙作勝遊

牡丹開後未窺園空谷跫然客到門為道先今皆世譜

殷勤尊酒好同論

新筠解籜破苔荒共話林亭夏晝長筆落忽聞風雨至

梅花古研發奇光時惠灌研詩

送客勞勞折柳時，可堪多病歎支離。
偶有足疾分攜且訂重來約，
欲讀韓蘇過嶺詩。

夏日嚴提臺湖舫燕集二首

亭新蘇圃漾晴空，
小隊凭臨把臂同。
北牖迎涼芳草外，
西山倒影夕陽中。
故延歌管因遲月，
不事帆檣亦御風。
荷葉初浮香細細，
一聲鐘度野橋東。

開窗如坐小蓬壺，
勝地招攜興不孤。
日暖魚龍恬鼓角，
煙銷甲馬狎江湖。
開尊梵語供清越，
入夜漁燈乍有無。
盡醉渾忘更漏徹，
還移畫舫泛菰蒲。

送龍臚先之任遵化

梧桐葉落動秋聲，
送客鳧飛古北平。
萬里關山明月峽，

一尊砧杵故園情，
最難仕宦高堂健。
更喜邦畿則賦輕，
分手莫言離別遠。
帝鄉容易起榮名。

七夕同內人夜坐時熱甚無雨為立秋前五日

暑熾驕陽火未流，
銀河清淺倍生愁。
情深有淚難成雨，
橋度先期豈待秋。
風咽蟬聲遲桂楫，
桐移月影上鍼樓。
終宵徙倚誰高臥，
茗話閒同聽小謳。
小吳度曲

立秋後一日午憩小園喜再嘗荔枝兩度分餉
為提督總鎮故未及之

井幹初飄暑尚殘，
拋書一枕倚琅玕。
夢迴小篆冰生液，
香擘輕紅雪滿團。
為詠東樓詩句好，
杜子美寧同北客畫圖

看白樂天怪來昔重將軍樹，
坡公以荔枝為將軍樹幕府頻分獻齒寒。

送實行老僧還南華二首

曹溪手闢古道場每將功德美賢王
纔來忽漫還山去嶺外仍傳佛火香
馬駒舊迹在東湖吸盡西江可有無
何事老僧留不得又衝暑雨布帆孤

再送沈方艸

盛夏君偏去重來別石亭高天梅雨潤
晚市柳煙青問瀑尋三疊青原凌巖禮七星
粵東有七星巖詩成惟有醉莫遣片時醒

己酉菊月送蕭左狂徐元定之任滋陽魚臺二邑二首

為喜仙鳧去雙飛到兗東絃歌通汶泗
山水接龜蒙風雨重陽近江天遠權同一尊頻送客老我別離中
鄉國才名並分符共一方琴聲依魯殿秋色滿宣房皆
河地古思賢聖公餘話梓桑清華今發軔鴈鷺看成行
重九後三日小園看月同遠山聯句

秋夜園林靜梅相攜步小廊疎星因月澹遠叢桂入茶
香鶴夢偏忘露梅蛩吟每信霜深林清籟度遠小似促
菊花忙梅尚未見菊

秋日送汪次華涂烈人公車北上兒子裕亦且成行

清秋同泛孝廉船夾岸黃花映紫煙射策竚看新甲第

成名又喜值康年從來兄弟欣蘭社還許兒曹共錦韉
計日行行天路近春風洗耳聽臚傳

題龔元凱小像

時自楚歸

貌得仙翁倍有神靈巖芝草自生春扁舟黃鶴歸來晚
曾否逢吹鐵笛人

寄青原和尚四首

夢魂每繞故山飛憶共探泉上翠微何日重來尋舊約
歸雲閣上看雲飛

青原山志廣搜羅點綴名山事不磨老眼閒揩燈下讀
香歸一瓣對維摩

高閣傳聞傷古荆知公慘澹費經營而今賸有閒棲地

一杖毋煩計遠行

天界曾依浪丈人天風吹斷幾多塵殷勤盡發琅函祕
古洞深冬草木春

寄懷周櫟園司農二律

書來雙鯉問南州未報瓊瑤歎滯留鷺水依然流六代
雞林久矣重千秋雲煙過眼臨江閣風雨懷人讀畫樓
滿目蒼波無限思潮聲日夕石城頭

官下勞勞倍覺閒金陵佳麗任爛斑頻傳對客詩無酒
莫辨當樓畫與山擊楫每思尋蠟屐扶筇豈合老柴關
何時盡發琅函祕賴古堂深坐不還

人日和遠山韻

六年前已是懸車每賦閒情自晏如舊律重翻新臘閏
新詩細和值晴初人逢勝日煙生柳老啜芹羹雪煮蔬
兒女歡騰今歲好還將蘿薜引簪裾

來鷺詩為劍令房慎菴賦二首

客到逢公暇尊浮草樹馨五絃揮曲渚一鳥下中庭飛
雪高拳雨窺池細啄萍衙齋清似水不異宿沙汀
政成纔幾月燭斗劍光橫不有憂民思難兼及物誠機
忘鷗共狎唳遠鶴同聲篋羽何人賦梨花滿院明

為鹿游胡郡丞題潯陽閱江圖

時攝篆
余邑

荒園雨話剪春蕪偶展潯陽按部圖遠澈帆檣衝浪起
中流砥柱倚雲孤翩翩裘馬今王謝湛湛風標古白蘇

一去甘棠餘九派重來碧嶂聳三吳冰霜閣阜千山徹
惠澤薌林四野敷盡道軍屯稱作楫奚緣吉邑借專符
下車蒿目驚新法簡籍勞心理舊逋曾幾何時歸覆露
還聞此日尚瞻呼名垂潔行原家學清畏人知有令模
數歷西江周宦轍漸看北閣啓華途謂宜更付丹青寫
湓浦瀟灘接鑑湖

庚戌元日雪試筆

光徹彤雲曉漏催飛花點點帶陽回窗翻碎影還疑月
崖逗微香始辨梅喜共魚軒誇得句微聞鳥語勸銜杯
兒童正是思親日竚聽春江暖浪雷

元夕二首

毋煩紫陌逐遊車點綴園林已自舒亂列餘燈星欲落
微霑小雨月如初伶翻古調宜酣酒僧餽新芹且飯蔬

時湖僧送新蔬至

却笑深宵蠻舞好依然獵火照宮裾

閩人蠻裝明如出塞亦佳

千門火樹簇香車繞邾歡騰意倍舒皎月當空秋夜永
和風送暖正春初詩成道蘊還賡句酒對陽元小摘蔬

陽元以況外孫

遙憶天街三五夕宮花點點上華裾

十四夜看燈見兒孫戲舞且外孫鄭水

共賞因和其外祖母韻又疊成一章時正立春日也

庚戌閏月望前三日得裕兒南宮捷報并聞幼

青叔子和姪同登甲第志喜

御苑春風蹋錦鞦捷音忽到曉窗前成名又喜逢康歲
接武還看是戊年六世承恩天浩蕩三人同榜澤絲延

梅崖更有奇先兆竚聽臚聲第一傳

吉水李梅公先生以名進士仕至少司馬風流弘長扶

掖後進身持海內文章之柄者數十年所著古今體詩

及與朱淑人相倡和凡二十餘種自選其尤者各為一

目先後刊布而統名之曰石園詩集其遺詩四卷則今

大司農醒齋公蒐羅散逸而得之身後者也手澤所存

片紙隻字奉為鴻寶公仁心為質孝思不匱其大端具

見於此矣司馬天才敏妙下筆成章不待繩削而自然

中律合度前輩諸公所以序之者技微洞奧極其揚扃

余無庸贅辭唯是遺詩非集中之至者而清詞麗句猶

復疊出不窮真所謂殘膏賸馥足以沾溉後人者也望

洋而歎不能自己司農年踰五十而慕親之念不衰每
逢忌日則齋居一室蔬食素服戒閤者勿通賓客凝神
定氣思其飲食思其笑語思其嗜好殆有如耳聞而目
見焉是猶曩者輯遺詩之志也故其子孫遵行家教咸
恂恂孝謹去華而務實福澤縣延正未可量又於此見
其先公與太夫人之令德自足詒燕百世不徒文辭雙
美爲藝林之佳話云康熙壬午首夏後學德清胡渭跋

石園全集卷二十二

